



## Između zahvalnosti i obijesti (Medina)

Hatib: dr. Salah ibn Muhammed el-Budejr

11. rebiul-ahir 1447. po Hidžri / 3. oktobar 2025.

Hvala Allahu hvalom koja ispunjava Zemlju i nebesa. Upotpunio nam je vjeru i blagodat, podario nam uputu, popravio duše i usmjerio ih pravim putem, opskrbio nas i obasuo blagodatima. Svjedočim da nema boga osim Allaha, Jedinog, Koji nema sudruga, svjedočenjem koje spašava onoga ko ga izgovori, gdje god da se okrene, i svjedočim da je naš vjerovjesnik i naš prvak Muhammed, sallallahu alejhi ve sellem, Njegov rob i poslanik svjedočenjem koje briše sljepoću srca i donosi svjetlost blagodati. Neka je salavat na njega, na njegovu porodicu i ashabe, onoliko koliko putnik putuje, odmara i boravi.

O muslimani, bojte se Allaha i neka vas ne zavara dunjalučki život, jer kada vam dunjaluk dođe, iskuša vas, kada se udalji, učini vam dobro, kada procvjeta, uvehne, kada se poveća, "ujede", kada vas obraduje, rastuži vas.

"Reci: 'Uživanje na ovome svijetu je kratko, a onaj svijet je bolji za one koji se grijeha klone; i nikome se od vas ni koliko trun jedan neće učiniti nepravda.'" (En-Nisa, 77)

O muslimani, bogobojazni i pokorni raduju se blagodatima radošću zahvalnosti, spominjanja Allaha, hvale i slavljenja. Ne zanose se imetkom, ne skreću u zabavu i razmetanje. Blagostanje ih ne obmanjuje, niti ih nevolje slome. A oni oholi, skloni raskoši i rastrošnosti, raduju se opskrbi i hvale se pred ljudima. Njihova navika je oholost, raskoš i uzdizanje. Uvijek se natječu u pokazivanju luksuza, stoke, imetka i potomstva. Uzdižu se nad sebi ravnima, i nad siromašnima, i lome srca slabih. To je stanje onih koji su puni oholosti, umišljenosti i neznanja, ne mare za osjećaje uskraćenih, ne brinu za bol unesrećenih, protjeranih i bolesnih.

Uzrok tome je razmetljivost koja zasljepljuje, zanesenost koja odvraća, uronjenost u ljubav prema dunjaluku, zavaravanje njegovim ukrasima, uzdizanje sebe i





omalovažavanje drugih, ljubav prema slavi i isticanju, objest opijenosti, a ne radost zahvalnosti. Takva djela dolaze samo iz srca ispunjenog ohološću, neznanjem i nepravdom, iz kojeg je nestalo skromnosti, pa ga obuzme nemar i navede na greške. Uzoholi se, uzvisi, hvali se, gleda ljude s prezirom, hoda među njima razmetljivo, obraća im se oholo.

Šejtan puhne svoj dah, pa se kod razmetljivih javi uzbuđenje, slast i zanesenost. To ih navede na nerazumno trošenje, rasipanje, trošenje u grijehu, uništavanje imetka radi pokazivanja, hvalisanja, takmičenja i uzdizanja. Allah kaže: "Znajte da život na ovome svijetu nije ništa drugo do igra, i rasonoda, i uljepšavanje, i međusobno hvalisanje i nadmetanje imecima i brojem djece!" (El-Hadid, 20)

Ibnul-Kajjim kaže: "Hvalisanje blagodatima znači da se čovjek njima uzdiže nad ljudima, pokazuje im da je bolji i veći, pa ih nastoji poniziti, 'zarobiti' njihova srca i potčiniti ih sebi, da mu se dive i da mu služe."

Razmetljivac, umišljeni, oholi mrzak je Allahu i ljudima, pa makar uljepšavao svoj govor. Allah kaže:

"Allah, zaista, ne voli one koji se ohole i hvališu." (En-Nisa, 36)

"Allah ne voli ni gordog ni hvalisavog." (Lukman, 18)

Kur'an na mnogim mjestima zabranjuje radost zbog blagodati koja vodi u razmetljivost, zanesenost, samodopadanje i hvalisanje. Allah kaže: "A ako ga blagodatima obaspemo, poslije nevolje koja ga zadesila, on će, sigurno, reći: 'Nevolje su me napustile!' On je doista umišljen i razmetljiv." (Hud, 10)

U komentaru ovog ajeta, Ibn Abbas kaže da to znači: "Pred Mojim prijateljima razmeće se i hvališe blagodatima koje sam mu dao."

Allah kaže: "Allah ne voli nikakve razmetljivce, hvalisavce." (El-Hadid, 23)

"Kad čovjeku damo da blagodat Našu osjeti, on joj se obraduje." (Eš-Šura, 48)

"Ne budi objestan, jer Allah ne voli one koji su objesni! – govorili su mu ljudi iz naroda njegova, 'i nastoj da time što ti je Allah dao stekneš onaj svijet, a ne zaboravi





ni svoj udio na ovome svijetu i čini drugima dobro, kao što je Allah tebi dobro učinio, i ne čini nered po Zemlji, jer Allah ne voli one koji nered čine.” (El-Kasas, 76–77)

Razmetljivac, zanesenjak, hvalisavac, pokazuje putem društvenih mreža svoje bogate trpeze, prostirke, jastuke, raskošne kuće, vrtove, voćnjake, odjeću, rijeke, luksuzna vozila, prostrane salone, sve snima, pokazuje i objavljuje, da bi bio poznat, da bi ga ljudi spominjali, da bi imao više pregleda i pratilaca.

A to je samo lahkomislenost, umišljenost i čista glupost, koja mu neće donijeti nikakvu korist na ahiretu. Koliko je onih koji su se hvalili bogatstvom i moći, a sada su zarobljenici kabura. Nisu im koristila njihova djela, niti ih je spasila pohlepa za sitnim prohtjevima.

Allah kaže: “Zaokuplja vas nastojanje da što imućniji budete sve dok grobove ne naselite. A ne valja tako, saznat ćete svakako! I još jednom, ne valja tako! Saznat ćete sigurno! Ne valja tako, neka znate pouzdano, Džehennem ćete vidjeti jasno! I još jednom, doista ćete ga vidjeti očigledno! Zatim ćete toga dana za sladak život biti pitani sigurno!” (Et-Tekasur, 1–8)

Gdje su stanovnici palača i dvoraca? Gdje su carevi i moćnici? Gdje su očevi i djedovi? Gdje su bolesni i oni koji su ih obilazili? Gdje su oni iz plemena Nizar i Ijad? Gdje je narod Semud koji je klesao stijene u dolini? Gdje je narod Ad, Irem sa stubovima, kakvih nije bilo u drugim zemljama?

Boj se Allaha, o ti koji se razmećeš i uzdižeš. Odustani od uzdizanja dobrovoljno, prije nego što budeš prisiljen. Jer, ti si rob, ponižen, slab, potčinjen, okružen sa svih strana onima ispod i iznad sebe. Ne priliči ti oholost, ni uzdizanje, ni razmetanje.

Loš je onaj koji se uzdigne i zaboravi Uzvišenog. Loš je onaj koji se uzoholi, ponaša se silno i zaboravi Silnog. Loš je onaj koji se zanese i zaboravi kabur i raspadanje. Loš je onaj koji se uzoholi i zaboravi početak i kraj.

Ebu Hurejra, radijallahu anhu, prenosi da je Poslanik, sallallahu alejhi ve sellem, rekao: “Dok je jedan čovjek hodao u odjeći koja mu se sviđala, počesljane kose,





razmetljivo hodajući, Allah ga je utjerao u zemlju, i on će u njoj propadati do Sudnjeg dana.” (Muttefekun alejhi)

Neka nas Allah sačuva puteva razmetljivih i oholih, i neka nas zaodjene odjećom skromnih i zahvalnih!

O muslimani, bojte se Allaha, budite svjesni Njegovog nadzora, pokoravajte Mu se i ne griješite:

“O vjernici, bojte se Allaha i budite s onima koji su iskreni.” (Et-Tevba, 119)

O muslimani, šerijat je dozvolio nošenje lijepe odjeće, biranje kvalitetnih haljina, korištenje plemenitih jahalica i udobnih vozila. Zato nosite odjeću koja vam dolikuje, čistu i dostojanstvenu. Vozite ono što odgovara vašem stanju. Uljepšajte se pri susretu s ljudima i posjeti braći. Pokažite Allahovu blagodat, počast i milost prema vama, ali bez oholosti, rasipanja, uzdizanja, hvalisanja i omalovažavanja onih koji su ispod vas.

Amr ibn Šuajb prenosi od svoga oca, a Šuajb od svog djeda Abdullaha ibn Amra ibnul-Asa da je Poslanik, sallallahu alejhi ve sellem, rekao: “Jedite, pijte, udjeljujte i oblačite se, ali bez oholosti i rasipanja. Allah voli da se vidi Njegova blagodat na Njegovom robu.” (Ahmed)

Ebu Ahves prenosi od svog oca da je rekao: “Bio sam kod Poslanika, sallallahu alejhi ve sellem, u pohabanoj odjeći, pa me upita: ‘Imaš li imetka?’ Rekoh: ‘Da, Allahov Poslaniče, i to svih vrsta.’ Na to on reče: ‘Ako ti je Allah dao imetak, neka se na tebi vidi trag toga.’” (Ahmed, Tirmizi i Nesai) U drugoj verziji stoji: “...neka se vidi Njegova blagodat i počast na tebi.”

Ebu Hurejra, radijallahu anhu, prenosi da je jedan čovjek došao Poslaniku, sallallahu alejhi ve sellem, a bio je lijep, pa je rekao: “Zavolio sam ljepotu, i dato mi je ono što vidiš, čak ne volim da me iko nadmaši, bilo u kaišu sandale, bilo u crvenom remenu. Je li to oholost?” Na to Poslanik, sallallahu alejhi ve sellem, reče: “Ne, oholost je kada se odbija istina i omalovažavaju ljudi.” (Buhari, El-Edebul-mufred)

Ebu Kilaba kaže: “Dunjaluk vam neće nauditi ako na njemu budete zahvalni.”





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,  
NIŠTA MANJE NE ZAOSTAJE NI ODABIR TEME, ODNOSNO MATERIJE  
KOJU TOKOM HUTBE ELABORIRA." (PREPOROD)

**HUTBE** 

Zato, o muslimani, bojte se Allaha, slijedite puteve zahvalnih i skromnih, i čuvajte se propasti razmetljivih i hvalisavih.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

